

TALK@FEM 2021: ECONOMIC CHALLENGES & OPPORTUNITIES FOR MALAYSIA DURING & POST COVID-19



DR. MUHAMMAD IQMAL HISHAM KAMARUDDIN

Fakulti Ekonomi dan Muamalat,
Universiti Sains Islam Malaysia (USIM).

13 Oktober 2021 – Fakulti Ekonomi dan Muamalat, Universiti Sains Islam Malaysia telah meneruskan tradisi untuk menganjurkan satu program *trademark* iaitu 'Talk@FEM' bagi siri Oktober 2021. Pada program Talk@FEM kali ini, tajuk yang dipilih adalah 'Economic Challenges & Opportunities for Malaysia During & post COVID-19'. Program ini telah dijalankan pada hari Rabu bermula jam 2.30 petang sehingga 4.30 petang melalui aplikasi Zoom. Seramai kira-kira 57 peserta telah menghadiri program kali ini melibatkan para pensyarah dan pelajar USIM, ahli akademik dari universiti tempatan dan juga pemain industri yang berkaitan. Tujuan program ini diadakan adalah sebagai wadah perkongsian, perbincangan dan percambahan idea secara santai bagi membincangkan isu-isu yang berkaitan cabaran dan peluang ekonomi Malaysia bagi semasa dan selepas COVID-19.

Sesi perkongsian ini telah disampaikan oleh Dr Mohd Afzanizam Abdul Rashid yang merupakan Ketua Ekonomi, Bank Islam Malaysia Berhad (BIMB). Beliau berpengalaman selama lebih daripada 20 tahun dalam pelaburan, terutama dalam bidang ekonomi dan pasaran modal. Sebelum ini, beliau pernah berkhidmat di beberapa buah institusi pelaburan seperti Khazanah Nasional Berhad, Kumpulan Wang Awam Persaraan (KWAP) dan agensi penarafan, Malaysian Rating Corporation Berhad (MARC) sebagai ahli ekonomi. Peranannya dalam Bank Islam adalah untuk memberi nasihat kepada bank mengenai isu-isu berkaitan makroekonomi seperti dasar fiskal dan kewangan yang boleh mempengaruhi persekitaran operasi pelbagai industri.

Seperti yang kita ketahui, COVID-19 telah memberi kesan yang sangat besar terhadap ekonomi global termasuk Malaysia. Berdasarkan ekonomi Malaysia pada tahun 2020, kita melihat bahawa kadar pengangguran turun hingga 5.3% pada bulan Mei 2020. Ringgit Malaysia juga menyusut kepada RM4.26 sebagai pertukaran untuk 1 USD pada bulan Julai 2020. Sementara itu, perbelanjaan swasta juga turun sebanyak 4.3% pada 2020. Antara sektor yang paling terjejas ialah pelancongan apabila mencatatkan

penurunan mendadak jumlah kedatangan pelancong di Malaysia dari 26.1 juta kepada hanya 4.25 juta pelancong pada pertengahan 2020.

Dalam mendepani situasi ekonomi yang mencabar ini, beliau menggariskan beberapa perkara yang perlu diambil perhatian. Pertama, negara haruslah kekal berdaya saing dalam apa jua situasi. Bidang utama yang perlu diberi tumpuan termasuklah pembangunan kapasiti yang betul serta peluang yang adil berdasarkan prestasi kepada pemain industri. Kedua, kerajaan perlu membezakan antara persamaan dan adil dalam pengagihan pendapatan negara. Ketiga, kerajaan tidak lagi menjadi pemain utama dalam ekonomi tetapi hanyalah sebagai pemudahcara. Keempat, ekonomi digital adalah kunci kepada peningkatan produktiviti. Terakhir, Rancangan Malaysia ke-12 (RMK12) harus membuka jalan untuk ekonomi yang mampan. Dalam hal ini, pelaksanaan adalah faktor kejayaan utama.

Program yang diadakan telah berjalan dengan lancar dan mencapai objektif yang ditetapkan. Setinggi penghargaan kepada penceramah jemputan Dr Mohd Afzanizam Abdul Rashid serta semua yang terlibat di dalam menjayakan program Talk@FEM siri Oktober 2021.

